

# JONONE PEPÁ YEPOKO TOPA SIRIMU BOKUME

*Jonone Topa Sirimu Pepámanga Ungu Pulu  
Mare*

*I pepá yepoko topa sirimu yemonga imbimu  
pepá tengā naa molemo, nalo ‘Temane peang-  
amo kinie i pepá yepoko kinie Jonone sike to-  
rumu.’ ningū pilimele. Akumunge pulumu i-  
sipe: Ou iboku ambolkonomonga yakondo boku  
JONO temane peangamonga ungu pulumu gomo  
449 kanani. Pe temanemo kinie ya pepá yepoko  
kinie anjo yando ungu mare telu sipe mele i-siku  
mimi siku kanani:*

**Temanemo....Jono Kumbi-Lepamo...Talo-  
Sipemo...Yepoko-Sipemo**

1:1,14.....	1:1	
1:14,18, 3:16.....	4:9	
3:19-21.....	1:6-7	
3:36.....	5:12	
5:24.....	3:14	
5:32,37.....	5:9	
8:44.....	3:8	
8:47.....	4:6	
13:34-35.....	2:7.....	5
4:23.....	5:3.....	6
5:11, 16:24.....	1:4.....	12
.....	4:2-3.....	7
.....	1.....	1
.....	4.....	4

*Jono Kumbi-Lepamo kinie Talo-Sipemoselo pepá  
topa sirimumunge ungu pulumu i-sipe:*

*Ye mare andoko Kirasinge yemboma mane  
sikulie ningendo: “Kangimu mele keri akumunge*

*kangimuni ulu peanga te paa manda naa temolo. Ulu peanga te telemolo kinie aku ulumu ulu kerila. Akumunge ulu peangama telemolo molo ulu kerime telemolo aku ulume pali keri. Minimu mindi peanga. Pulu Yemo yu minimu akumunge yu peanga. Yesusi yu Pulu Yemo molopalie paa sike mana kangi tengaa naa orumu. Yu Pulu Yemo molopili yu ye peanga. Sike mana ye te molkanje ye keri te molka akumunge yu sike mana ye te anaa lierimu.” niringi. “Molo sike mana yembo kangi tengaa ombo molorumu liemo kagine suku molorumu yembomo lupe, yu lupela. Kangimu kinie minimu kinie yembo telumu molo.” niringi. “Eno i-sipe i-sipe pilipe konginjeli mare tondolo munduku piliengi liemo molko kondonge aulkena punge.” niringi. Pe Kirasinge yembo marene kanu ungume pilku likulie ‘Pilipe konginjeli awisili konopune pepili.’ ningu konopuni pilingendo mindili siku molko, kangimene paa ulu kerime mindi teko moloringi. Jonone enondo nimbendo: “Kanu ye kolo toko sumbulu tolina molemele yemboma enonga talapena eno-kinie paa naa molangi, toko makorangi.” nimbe sike sumbi siku molko, molko kondonge aulkena punge mele ungu mare altopa mane sirimu.*

*‘Jono ye-andamo molopa Epesasi taono molopalie, Epesasi taono lierimu kolea Esia poropinji koleamanga Kirasinge yembo talapema ipepáma topa sirimu.’ ningu pilimele.*

*Ya ungu pulumu pora nikimu.*

**JONO KUMBI-LEPAMO**  
**JONOne KUMBI-LEPA Pepá Topa**

## Sirimu Bokumu

*Jonone I Pepá Topa Sirimumunge Ungu Pulu  
Mare*

*Ungu pulu mare inie yakondo nondopa gomo  
1239 molemomo paa kanani.*

*Ungu paa tondolo te 1:5-2:2 molopa, te 3:1-2, te  
5:11-12 molemo.*

*Ungu pulu mare boku ambolkonomonga alsena  
anjokondo "24. laip", "31.3. pikinini bilong God",  
"32.2. Pikinini Bilong God", "42.4. wanpela  
samting nogut" molemo.*

*Ya ungu pulumu pora nikimu.*

*1:1-3:10 OLIO PA TELINE ANDOPO MOLOPO,  
'SUMBULU TOLINE MOLEMELE YEMBOMANE  
OLIO KONDI NAA TANGI.' NIMBU MOLAMILI  
UNGU TE*

*1:1-4 "Konde Molopa Kondoli Ungu Akumu  
Yesusi." Nirimu Ungumu\**

<sup>1</sup> Konde molopa kondoli ulu pulumu-kinie molemo yemo eno nimbu siemili. Yu ou-pulu-pulu molorumu yemo; yu olio pilierimulu yemo; yu mongone kanorumulu yemo; yu neme-neme nimbu kanorumulu yemo; yu kini ambolorumulu yemo; akumu Pulu Yemonga Ungu Yesusindu nikimulu.

<sup>2</sup> Konde molopa kondoli ulu pulu kanumu<sup>†</sup> wendo ombo mona molorumu, olione yu kanopolie paa sike kanorumulu mele nimbu sikimulu. Molopa mindi puli ulu pulumu Lapa kinie

---

\* **1::** Jono 1:1,2,4,14. Ya 1:1-2 mele ungu pulu te inie anjokondo 4:2-3 molemo. **† 1:2:** bokumunge alsena anjokondo "24. laip".

molopalie olio molorumulune omba mona molorumu kanorumulu mele eno nimbu sikimulu.

<sup>3</sup> 'Eno olio kinie pea tapu topo molamili.' nimbu olione kanopo pilierimulu mele eno kepe nimbu sikimulu. Tapu topo molemolomonga pulu kanumu isipe: Olio Lapa kinie yunge Malo Yesusi Kirasi<sup>‡</sup> kinie pea tapu topo molemolo akumu.

<sup>4</sup> 'Eno pea olio konopu kamu siemili.' nimbu iungumu nimbu pepána tokomolo.

### *1:5-10 "Pa Teline Andopo Molamili." Nirimu Ungumu*

<sup>5</sup> Pulu Yemonga Malone olio nimbe sirimu ungumu eno nimbu sikimulu akumu isipe: Pulu Yemo pa telimu. § Yu-kinie sumbulu toli te paa naa pelemo. Ulu pulu keri te kepe kalaro te kepe yu-kinie naa pepa, yu ye pilipe konginjeli pepa kake tepa molopa kondoli yemo.

<sup>6</sup> Olio 'Pulu Yemo yu-kinie kapola tapu topo molemolo.' nimbylie sumbulu tolina andopo molomulu liemo kolo topo, "Telemolo." nilimolo mele naa telemolo.

<sup>7</sup> Nalo yu pa teline molemo mele olio pa teline andopo molomulu liemo olionga angenupili kinie kapola tapu topo molemolo kinie yunge Malone yunge meme olionga nimbe ondo lenderimumi olio ulu pulu keri telemolo konopune pelemoma pali kulu tondolemo.\*

---

<sup>‡</sup> **1:3:** bokumunge alsena anjokondo "32.2. Pikinini Bilong God", "23. Krais". § **1:5:** Jono 1:4,5,9, Ou-Tesallonaika 5:4-8. \* **1:7:** Ipuru 9:14, Lipe Ora Sirimu 1:5.

<sup>8</sup> Olione nimolondo: “Ulu pulu kerime naa telemolo, te naa pelemo.” nimulu liemo kolo tolemolo, ungu sikema olio-kinie naa pelemo.

<sup>9</sup> Nalo ulu pulu keri telemolo temoloma nimbu para simulu liemo Sumbi Sipe Telemo Pulu Yemone “Tembo.” nimbe panjerimu mele pilipelie tembando olionga ulu pulu keri nimbu para simoloma ‘Manie pupili.’ nimbe siye kolopa, olionga konopune kalaro mele molemo molombama kanopalie ‘Kelepa kake tepili.’ nimbe kulumiye tondolemo tondomba.

<sup>10</sup> Nalo olione nimolondo: “Olione ulu pulu keri te paa naa telemolo, paa naa terimulu.” nimulu liemo aku ungu nilimolomone “Pulu Yemo yu kolo toli yemo.” nilimolo, yunge ungumu olio-kinie naa pelemo.

## 2

### *2:1-6 Kirasi Olionga Lipe Tapondolimu*

<sup>1</sup> Nanga ambolango nanama, ‘Eno ulu pulu kerime naateangi.’ nimbu ipepámo eno simbo tokoro. Nalo enonga yembo tene ulu pulu keri te temu liemo olionga nimbe lipe tapondopa Lapanga kumbikerena mawa tendelemo yemo molemo. Akumu ulu sumbi nilime mindi teli ye Yesusi Kirasi.

<sup>2</sup> Yu ‘Enonga ulu keri telemelemanga Pulu Yemone eno naa topili. Eno kolea kerine puku molko kenjiku mindi naa pang.’ nimbu, ‘Enonga ulu pulu kerime ombo manie pupili.’ nimbu, ‘nanga mememo ondo lendepo kolambo.’ nirimu yemo. Olio Isirele yembomanga mindi

molola. Ma koleana yembomanga pali ulu pulu keri teringi telemelema ‘Pulu Yemone ‘Ombo manie pupili. Pe altopo naa pilipu molopolie eno tepo naa kenjembo.’ nipili.’ nimbe Kirasi yu mana yembomanga pali kolondorumu.

<sup>3</sup> Kirasini oliondo “Teaa.” nirimu mele pilipu lipu temulu liemo ‘Yu paa sike kanopo pilipu molemolo.’ nimbu pilimolo.

<sup>4</sup> Yembomane ‘Yu olio kanopo pilimolo.’ ningulie yuni “Teaa.” nirimu mele pilku liku naa telemele, kanu yemboma eno ungu kolo toli yemboma, yunge ungu sikema konopune naa pelemo.

<sup>5-6</sup> Nalo yuni “Teaa.” nirimume pilku liku telemele yemboma paa kamu Pulu Yemo konopu mondoko kondolemele. ‘Olio yunge yemboma molopo yu pea tapu topo molemolo.’ nilimele yemboma Pulu Yemone “Tei.” nirimu mele Yesusini pilipe lipe tepa molorumu mele enone aku siku Yesusini “Teaa.” nilimo mele pilku liku teko molangi. Yesusi Pulu Yemonga ungume tepa molorumu aku mele Yesusinge ungu manema pilipu lipu tepo molopolie ‘Olio sike yunge yemboma molopo, sike yu pea tapu topo molemolo.’ nimbu pilimolo.\*

*2:7-17 Unzu Mane Kondemo† “Oliolio Anjo Yando Konopu Mondamili.” Nirimu Ungumu*

*2:7-14 Yembo Tene Angenupili Konopu Mondolemomo Pa Teline Molemo Ungumu*

---

\* <sup>2:5-6:</sup> Ou-Pita 2:21-25. † <sup>2:5-6:</sup> Jono 13:34-35, 15:9-17.

<sup>7</sup> Nanga pulu lemo yemboma, i pepá tokoro ungu manemo konde te molo. Akumu korongau Kirasinge yemboma pulu polko molkolie nirimulu pilieringi ungu manemo.

<sup>8</sup> Aku sike nalo kinié ipepá tokorona ungu mane konde te sikiru. Iungu manemonga pulu yamu ou Kirasini tepa molorumu mele kanopo, yandopa eno teko molemele mele kanopolie ‘Aku ungu mane kondemo yu sike lemo.’ nimbu kanolemolo. Sumbulu tolimu kamu pora nimbé tekemo, pa telimu koronga wendo orumumu kinié pa telemomonga eno aku siku molemele mele kanopo ‘Akumu ungu mane sikemo.’ nimbu kanolemolo.

<sup>9</sup> Yembo tene “Na pa teline molio.” nilimo nalo yunge angenupili kinie konopu keri panjilimo akumunge yu sumbulu tolina we molemo.

<sup>10</sup> Yembo te yunge angenupili konopu mondolemomo pa teline molemo, yu altopa atomba melte pa teline naa lemo.

<sup>11</sup> Nalo yembo te angenupili kinie konopu keri panjilimo yembomo sumbulu tolina molopa, sumbulu tolimuni yunge mongomo pipi silimona aulkema manda kanopa sumbi sipe naa pulimo.

<sup>12</sup> Nanga ambolangoma,  
Kirasinge imbimu walseringimunge‡  
Pulu Yemone enonga ulu pulu kerime  
‘Manie pupili.’ nimbe siye kolorumumunge  
i pepámo eno topo sikiru.

<sup>13</sup> Tara keme,

---

‡ **2:12:** bokumunge alsena anjokondo “23. Krais”, “28. nem”.

iyé ou-pulu-pulu molorumu kinié we molemo  
yémo  
pilku imbi silimelemonga  
nane eno i pepámo topo sikiru.  
Kango yema, enone  
ulu kerimenga pali ulu pulumu pelemo ,kuru,  
mu\$  
toko manie mundoringimunge  
nane eno i pepámo topo sikiru.  
<sup>14</sup> Ambolango nanama,  
Lapamo kanoko imbi silimelemonga  
i pepámo eno topo sikiru.  
Tara keme,  
iyé ou molorumumu kinié we molemomo  
pilku imbi silimelemonga  
i pepámo eno topo sikiru.  
Kango yema,  
eno enge ningu, Pulu Yemonga ungumu  
enonga konopune pelemo, enone  
ulu kerimenga pali ulu pulumu pelemo ,kuru,  
mu  
toko manie mundoringimunge  
eno i pepámo topo sikiru.

*2:15-17 Ma Koleana Melema Olio Konopu Awili  
Tepo Naa Mondamili Ungumu*

<sup>15</sup> Mana ulume kinie mana melema kinie konopu naa mondoko, aku melema konopu kimbu siku naa molangi. Yembo te mana ulume konopu mondomu liemo kanu yembomone Lapa konopu mondolemo ulu pulumu yu-kinie naa pelemo.

**§ 2:13:** bokumunge alsena anjokondo “42.4. wapelam samting nogut”.

**16** Aku nambemune, mana melema pali, ulu pulu keri telemele yembomane melte kanoko "Liemboa!" molo "Teamboa!" nimbe konopu mondolemele melema kinie, yembomane mongo-kenge telemele ulume kinie, mongo kondoko kara pulimele ulume kinie, aku mana ulume pali Lapa kinie wendo naa olemo, ma koleana mindi wendo olemo kene aku mana ulume konopu naa mondangi.

**17** Mamo kinie mele konopu mondolemele melema pali pora nimbé nalo yembo te Lapane "Tei." nilimo mele pilipe lipe tengenji panjipe tepe molemo yembomo alieli molopa kondopa mindi pumbe.

*2:18-27 Kirasinge Opa Puluema Koronga  
Wendo Oringi Ungumu*

**18** Nanga ambolangoma, ma kolea pora nimbé walemo kinié wendo okomo. Kirasinge opa puluemo ombá eno ou pilieringi kanumu. Kinié kepe Kirasinge opa pulue awisili\* wendo olemele kanopolie 'Ma koleamo nondopa pora nimbé tekemo.' nimbu pilimolo.

**19** Kanume olio munduku siye kolko ulsu purgingi, nalo ou olio-kinie pea molorumulu kinie kanume olionga yemboma sike naa moloringi. Eno sike olionga yemboma molemelanje olio-kinie pea we molemela. Nalo olio munduku siye kolko purgingi akumunge kinié lipu manjikimulu akumu olionga yembo mare molo.

---

\* **2:18:** Jono Talo Sipemo 7.

**20** Nalo Mini Kake Telimu Kirasini lipe mundo-rumu lsingi akumunge kinié eno pali sike ulume pilku apuruku kondolemele.

**21** ‘Eno ungu sikema naa pilimele.’ nimbu ipepámo naa topo sikiru. ‘Eno ungu sikema pilimele, aku ungumenga ungu kolo tolime wendo naa olemo.’ nimbu ipepámo tokoro.

**22** Kolo toli yemboma nameleye? ‘Yesusi yu Pulu Yemone ‘Lipu mundumbo.’ nirimu ye nomi Kirasimu<sup>†</sup> molo.’ nilimele yemboma eno kolo toli yemboma. Kanu yembomane Lapa kinie Maloselo “Molo.” ningu liku bulu silimelemonga eno Kirasinge opa puluema molemele.

**23** Yembo tene Malo<sup>‡</sup> “Molo.” nimbe lipe bulu silimo yembomone Lapa kepe “Molo.” nimbe lipe bulu silimola. Yembo tene Malo ‘Sike.’ nimbe ‘Pea tapu topo molambili.’ nilimo yembomone Lapa kepe ‘Sikela.’ nimbe ‘Pea tapu topo molambili.’ nilimola.

### *2:24-28 Ungu Sikema Mini Kake Telimuni Olio Mane Silimo Ungumu*

**24** Eno ou pilieringi ungume ‘Konopune paa kamu pepili.’ ningu konopuni tondolo munduku pilku molangi. Aku siku tengi liemo eno Malo kinie Lapaselo kinie pea alielie tapu toko molonge.

**25** Yuni olio “Simbo.” nirimumu isipe mele: “Eno alielie molko kondoko mindi punge ulu pulumu<sup>§</sup> simbo.” nirimu.

---

<sup>†</sup> **2:22:** bokumunge alsena anjokondo “23. Krais”.    <sup>‡</sup> **2:23:** bokumunge alsena anjokondo “32.2. Pikinini Bilong God”.

<sup>§</sup> **2:25:** bokumunge alsena anjokondo “24. laip”.

<sup>26</sup> Yembo marene eno kolo toko kondi tolemele  
aku yembomanga nane eno i pepámo topo  
sikiru. „Akume Kirasinge opa puluema.“\*

<sup>27</sup> Nalo eno Kirasini Mini Kake Telimu sirimu  
lsingi akumu eno kinie molemomonga yembo  
tene eno ungu mane simbe ungu te molo. Mini  
Kake Telimuni eno ulume pali mane silimo. Aku  
ungu mane silimoma kolo naa tolemo, ungu  
sikema mindi. Akumunge yuni eno mane silimo  
mele Kirasi kinie alieli tapu toko molangi.

### *2:28-3:10 Pulu Yemonga Ambolangomanga Ungu Te†*

<sup>28</sup> Sike, nanga ambolangoma, kinié eno yu  
kinie tapu toko molko mindi pang. ‘Aku temolo  
kinie pe yu ombá kinie kanopolie pipili naa  
kolopo yunge kumbi-kerena sumbi sipu pupu ola  
angilimolo.’ ningu aku siku yu kinie alieli tapu  
toko molangi.

<sup>29</sup> ‘Kirasi ye paa sumbi nilimu.’ ningu pilkulie  
nilimelemone, ulu sumbi nilime tepa molemo  
yembo te kanokolie ‘Yu Pulu Yemone “Nanga  
ambolango molani.” nirimu,‡ yunge ambolan-  
gomo molemo lemo.’ ningu pilimelela.

## 3

<sup>1</sup> Olionga Lapane olio paa konopu mondolemo  
mele kanayo. Olio konopu awili tepa mondopalie  
nilimomone, yuni imbi lepa oliondo “Nanga

---

\* <sup>2:26:</sup> Jono Talo Sipemo 7. † <sup>2:27:</sup> bokumunge alsena  
anjokondo “31.3. pikinini bilong God”. ‡ <sup>2:29:</sup> 3:1-2 Jono  
1:12-13, 3:3-8. Ya 2:29 akune Giriki ungune “Pulu Yemone yunge  
ambolango merimu molemo.” nimbe molemo.

ambolangoma." nilimo. Pe olio paa sike aku sipu molemolo. We yembomane olio Kirasinge yembomando 'Pulu Yemonga ambolangoma.' ningua pilimelemonga pulumu niembo. Enone ou Yesusi kanokolie 'Yu Pulu Yemonga Malo.' ningua naa pilieringi mele kinié aku mele olio 'Pulu Yemonga ambolangoma.' ningua naa lapilimele.

<sup>2</sup> Nane konopu mondolio pulu lemo yemboma, kinié olio Pulu Yemonga ambolangoma molemolo nalo pe olio molomolo mele isili-ou naa pilimolo. Naa pilimolo nalo pe Kirasi yando ombo mona molomba kinie yu molemo mele kanopolie nimolomone, 'olio yu molemo mele aku sipu molomolo lemo.' nimbu pilipu molemolo.

<sup>3</sup> Yembo "Yu ombá." ningua yu nokoko molemelemane pali "Kirasi yu konopu kake tepili molemo mele olio aku sipu molamili." ningua enonga konopukundu kulumiye toko molemele.

<sup>4</sup> Ulu pulu keri telemele yembomane Pulu Yemonga ungu manema liku su siku pulue tolemele. Ulu pulu kerimenga pulumu isipe: Pulu Yemonga ungu manema liku su siku pulue tolemele aku ulumu ulu pulu kerimenga pulu akumu.\*

<sup>5</sup> Kirasini 'Ulu pulu kerime manie pupili.' nimbe mana manie orumu eno pilimele. Ulu pulu keri teluri kepe yu-kinie paa naa pelemo.

<sup>6</sup> Yu-kinie tapu toko molemele yemboma ulu pulu kerime teko mololiku naa pulimele. Yembo ulu pulu kerime teko mololiku pulimele yemboma Kirasi naa kanoko naa pilimele.

---

\* **3:4:** Ou Pulu Pulu 3.

<sup>7</sup> Nanga ambolango nanama, yembo tene eno kondi topa ulsu memba pumbe kene nokoko kondoko molangi. Yembo te ulu sumbi nili ulume telemo yembomo Kirasi ye sumbi nilimu molemo mele yu aku sipe molemola.

<sup>8</sup> Ou-pulu-pulu kepe kinié kepe kurumenga nomi, depelemone<sup>†</sup> ulu pulu kerime terimu telemomonga kinié ulu pulu keri telemele yemboma depelemonga yemboma molemele. Pulu Yemonga Malone depelemonga kongonomo topa manie mundumbendo mana omba kongono terimu.

<sup>9</sup> Pulu Yemone merimu yunge ambolango molemo yembomo Pulu Yemo yu molemo mele ulu pulumuaku yembomo kinie pelemomonga aku yembomone ulu pulu kerime manda alieli pilipe naa telemo temba. Pulu Yemoneaku yembomo merimu-na yuni ulu pulu kerime tepa molomba aulke te naa pelemo.

<sup>10</sup> Akumunge yemboma kanopolie, ‘Iyembomo Pulu Yemonga ambolangomo lemo. Imu depelemonga ambolangomo lemo.’ nimbu manda kanopo apurulimolo. Yembo tene Pulu Yemone kanopa peanga kanolemo ulu pulume naa telemo yembomo yu Pulu Yemone merimu ambolango te molo. Yembo tene yunge angenumu kanopa konopu naa mondolemo yembomo yu Pulu Yemonga ambolango te molola.

### *3:11-5:21 OLIONE YU-MELE-MELE YEMBOMA PAA SIKE KONOPU MONDAMILI UNGU TE*

---

<sup>†</sup> **3:8:** Setene kanumu; bokumunge alsena anjokondo “9. devil”.

*3:11-18(-24) Konopu Paa Sike Mondonge Mele‡  
Ungu Te*

<sup>11</sup> Ou-pulu-pulu pilku moloringi mele yandopa yandopa kinié pilku molemele ungumu isipe: Olio “Anjo yando konopu mondangi.” nirimu ungu kanumu.

<sup>12</sup> Ye Kénene terimu mele manda manjipu tepo naa molamili. Yu ulu kerimenga pali ulu pulumu pelemo ,kuru, munge§ ye te molopalie nirimu-muni, angenu topa kondorumu.\* Nambemune topa kondorumuye? Yu ulu pulu kerime terimu, angenu ulu pulu kake telime terimu kulu yu topa kondorumu kanumu.

<sup>13</sup> Angokeme, we yembomane eno sike konopu keri panjilimele nalo† “Nambemune aku telemel-eye?” ningu walsiku naa pilieme. Aku siku teringi mele telemele tenge mindi.

<sup>14</sup> ‘Olio angenupili konopu mondopo molemolo-na olio kolomolo aulkemo mundupu siye kolopolie, molopo mindi pumolo aulkena molemolo.’‡ nimbu pilimolo. Yembo angenupili konopu naa mondopa molemo yembomo yu kololi aulkemonga molemo.

<sup>15</sup> Yembo angenu konopu keri panjilimo yembomo yu yemboma topa kondoli yembomo.§ Akumunge pilipulie ‘Yemboma topa kondoli yembo te molopa kondopa mindi puli ulu pu-

‡ **3:10:** Jono 13:34-35, 15:9-17; Jono Kumbi Lepamo inie 4:7-21.

§ **3:12:** bokumunge alsena anjokondo “42.4. wanpela samting nogut”. \* **3:12:** Ou Pulu Pulu 4:1-16. † **3:13:** Jono 15:18-25.

‡ **3:14:** bokumunge alsena anjokondo “24. laip”. § **3:15:** Mateyu 5:21,22.

lumu yunge konopune naa pelemo.' nimbu pilipu molemolo.

<sup>16</sup> Konopu mondoli ulu pulumu pilimolo mele isipe: Yesusi Kirasi yu olionga 'Kolo wangopo kolondambo.' nimbelie kolorumu. Akumu olio\* paa konopu mondopalie we lipe tapondorumu. Pe kinié akumu pilipulie olio 'Angenupilinge kolo wangopo kolondamili.' nilimelanje papu.

<sup>17</sup> Yembo tene mana melema nosipe molopalie angenu te melte molo tomba kinie kanopalie kondo naa kolomu liemo Pulu Yemonga konopu mondoli ulu pulumu yunge konopune nambepa pelemoye? „Naa pelemo..”

<sup>18</sup> Ambolango nanama, "Na yemboma konopu mondopo molio." nimbu keremone mindi nimbu naa molamili. Yemboma paa sike konopu mondolondo eno kondo kolopo enonga ulume tendepo molamili.

### *3:19-24 Konopu Mondolemele Yemboma Pulu Yemo*

<sup>19-20</sup> Yemboma paa sike konopu mondopo kondo kolopo molomulu liemo 'Olio ungu sikemo pilipu lipu molemolo lemo.' nimbu pilimolo. Kanu kinie ulu te temolomondo olionga konopumene pilipulie 'Aku sipu tekemolomo tepo kenjikimulu.' konopu lepolie nimolomone, kelepo nimolondo: 'Olionga konopumene apurulimele mele maniendopa; Pulu Yemone mindi ulume pali mimi sipe pilipelie yuni mindi ,olione telemolo, ulume pilipe lipe apurulimo mele olan-dopa kene yemboma konopu mondopo kondo

---

\* **3:16:** Jono 15:13-14, Romo 5:6.

kolopolie olio ungu sike pelemo aulkena pupu ulu telemolomando konopumene ‘Tepo kenjikimulu.’ nimbu pilimolo mele naa pilipu, aku ulume konopu lipu naa mundemili.’ nimbulie nimolomone, mini-wale naa mundupu yunge kumbi-kerena pipili naa kolopo pupu molomolo.

<sup>21</sup> Nanga pulu lemo yemboma, olionga konopumene ‘I siku i siku tengime teko kenjengi.’ ni naa ningi liemo ‘Olio Pulu Yemone uluri naa temba.’ nimbu pilipu yunge kumbi-kerena mini-wale paa naa mundupu we molomolo.

<sup>22</sup> Kanu kinie, yuni “Teaa.” nirimu mele pilipu lipu tepo, yu kanopa peanga kanolemo ulume tepolie yundu “Si.” nimbu mawa temolo melema pali yuni simbe limolo.

<sup>23</sup> Yuni “Teaa.” nirimu mele isipe: “Nanga Malo Yesusi Kirasi ou terimu, kinié manda temba mele<sup>†</sup> ‘Paa sike aku terimu, paa sike aku manda temba.’ ningu tondolo munduku pilku yu mondoko pilku,<sup>‡</sup> yuni ‘Enono anjo yando konopu mondaa.’ nirimu mele aku siku teaa.” nirimu.

<sup>24</sup> Yembo Pulu Yemone “Teaa.” nirimu mele pilku liku telemele yemboma pali eno Pulu Yemo kinie tapu toko molemele, yu eno kinie tapu topa molemo.<sup>§</sup> Yuni yunge Minimu olio sirimu akumunge ‘Yu olio kinie tapu topa molemo.’ nimbu pilimolo.

Kanongendo Mini Wale Naa Mundulimele  
Ungu Te

---

<sup>†</sup> **3:23:** bokumunge alsena anjokondo “32.2. Pikinini Bilong God”, “23. Krais”, “28. nem”.    <sup>‡</sup> **3:23:** bokumunge alsena anjokondo “8. bilip”.    <sup>§</sup> **3:24:** Jono 14:15-21, 15:10; Jono Kumbi Lepamo inie 2:3, 4:13.

## 4

*4:1-6 Pulu Yemonga Minimu Kinie Kurume  
Kinie*

<sup>1</sup> Nanga pulu lemo yemboma, “Pulu Yemonga Minimuni na ungu umbu tondomume pilipu eno nimbu sikiru.” ningu kolo toli yembo awisili molemele akumunge yembo te omba aku sipe nimbé kinie eno sumbi siku ‘Sike lepamo.’ ningu yunge ungumu naa piliengi! Ou enonga mololi ulu pulume kanoko apurukulie ‘Sike Pulu Yemonga Minimuni nimbe simu-ne pilipelie nikimunje molo kolo tokomonje?’ ningu kanangi.

<sup>2-3</sup> Yembo tene konopuni pilipe ungu nilimo ungumu ‘Sike Pulu Yemonga Minimuni yu ungu umbu tondomunje apurupu piliemili!’ ningu i siku kanoko piliengi: Yembo tene “Yesusi Kirasi sike mana ye te omba molorumu.” nimbé yembomo\* sike Pulu Yemonga Minimu yunge konopune molopili nilimo. Nalo yembo tene Yesusindu aku sipe naa nimbé kinie kanokolie ‘Pulu Yemonga Minimu yunge konopune naa molemo, kuru te yunge konopune molemo.’ ningu pilinge. Kanu kurumu Kirasi-kinie opa puluemo, akumunge kanu yembomo Kirasi-kinie opa puluemo molemola. Ou “Ombá.” niringi pilieringi opa pulue kanumu kinié ma koleana koronga omba molemo.

---

\* **4:2-3:** inie yakondo 1:1-2. Ye marene “Mana ye te naa molorumu.” niringi ungu pulu te inie yakondo gomo 1239 molemo.

<sup>4</sup> Nanga ambolango nanama, enonga konopune molemo Minimu yunge tondolomo olandopa, we mana yemboma kinie molemo ‚kurumenga nomi, munge<sup>†</sup> tondolomo maniendopa, akumunge eno Pulu Yemonga yemboma molko, ‚Pulu Yemonga ungu nimbu sikiru.’ ningu kolo tolemele yemboma toko manie mundoringi.

<sup>5</sup> Kanu yemboma we mana yemboma mindi, akumunge enonga ungu nilimelema mana ungume mindi pilku nilimele, akumunge we mana yembomane enonga ungume pilku molemele.

<sup>6</sup> Nalo olio Pulu Yemonga yemboma molemolo. Pulu Yemone konopuni pilipe ulu telémoma paa pilimele yembomane olione nilimolo ungume pilku molemele. Nalo Pulu Yemonga yembo naa molemelemane olionga ungume naa pilku molemele. Akumunge, yembomane ungu nilimelema pilipulie ‚Iyemboma Pulu Yemonga Minimuni ungu sikema mindi nilimo Minimu konopune molemo, iyemboma yunge konopune kolo toli kurumu molemo lepamo.’ nimbu kanolemolo. Enonga Ungume Manda Apurumolo Mele Ungo Te

#### *4:7-21 Konopu Mondoli Ulu Pulumunge Ungu Te<sup>‡</sup>*

<sup>7</sup> Na konopu mondolio pulu lemo yemboma, Pulu Yemone ou-pulu-pulu olio konopu mondrorumu kene olione oliolio anjo yando aku sipu

---

<sup>†</sup> **4:4:** Setene kanumu; bokumunge alsena anjokondo “9. devil”.

<sup>‡</sup> **4:6:** inie yakondo 3:11-18, Jono 15:9-17.

konopu mondamili. Konopu mondoko molo-liku pulimele yemboma Pulu Yemonga ambolan-goma<sup>§</sup> molko yu telemo mele pilku imbi silimele.

<sup>8</sup> Konopu mondoli ulu pulumu Pulu Yemo kinie mindi pepa wendo olemo-na yemboma konopu naa mondolemele yembomane Pulu Yemo telemo mele kepe, molemo mele kepe, imbimu kepe, naa pilimele.

<sup>9</sup> Pulu Yemone konopu mondolemo mele olio lipe ora sirimu mele isipe: Yunge Malo telu mindi molorumu, nalo ‘Eno molko kondoko mindi pang'i kene nanga kangomo enonga nimbe kolo wangopa kolondopili!’ nimbe yuni akumu lipe ma koleana olio yembo kerimenga nimbe mundundorumu aku sipe Pulu Yemone konopu mondolemo mele olio lipe ora sirimu.\*

<sup>10</sup> Konopu mondoli ulu pulumu isipe: Olione Pulu Yemo ou konopu naa mondamili yuni olio we konopu mondopalie nirimumuni, ‘Nanga kangomo yunge meme ondo lepa enonga nimbe kolo wangopa kolondombamonga enonga ulu pulu keri teringi telemelena kamu manie pupili, altopo naa piliembo!’ nimbe, yuni yunge Malo ‘Olionga kolondopili!’ nimbe olio sirimu kanumu.

<sup>11</sup> Na konopu mondolio pulu lemoma, Pulu Yemone ,olio konopu mondopalie yunge Malo olionga nimbe sirimu, aku sipe olio konopu mondorumu kulu olione yembo lupema anjo yando konopu mondolemelanje papu.

---

§ **4:7:** bokumunge alsena anjokondo “31.3. pikinini bilong God”.

\* **4:9:** Jono 3:16.

**12** Mana yembo telurini kepe Pulu Yemo mongone naa kanoringi. Nalo olione oliolio anjo yando konopu mondromulu liemo Pulu Yemo olionga konopune molemo, yuni olio konopu mondopa kondolemo mele olio oliolio aku sipu kamu konopu mondopo kondolemolo.

**13** Yuni yunge Minimu olio sirimu kulu pilipulie ‘Yu olio kinie tapu topa molemo olio yu kinie tapu topo molemolo.’ nimbu pilimolo.<sup>†</sup>

**14** Lapane “Mana yembomane ulu pulu keri telemelemonga mongo lipu simbo molko kenjinge kene molko naa kenjengi liku tapondani pu!” nimbe yunge Malo<sup>‡</sup> lipe mundorumu olio mongone kanorumulu mele temanemo topo yemboma silimolo.

**15** ‘Yesusi yu sike Pulu Yemonga Malo.’ ningu, ningu para singe yemboma Pulu Yemo eno kinie tapu topa molomba eno Pulu Yemo kinie tapu toko molonge.

**16** Aku pilipulie, Pulu Yemone olio konopu mondolemo pilipulie ‘Yuni sike olio paa konopu mondolemo mondomba.’ nimbu tondolo mundupu pilimolo.<sup>§</sup>

Pulu Yemo yu konopu mondolimunge pulumu. Konopu mondoliwu andoko molemele yemboma Pulu Yemo pea tapu toko molemele, yu eno kinie tapu topa molemo.

**17** Yesusi mana molopa yemboma konopu paa sike mondopa molorumu mele olio aku sipu molomolo kinie olio-kinie konopu paa mondopa

<sup>†</sup> **4:13:** inie yakondo 3:24.    <sup>‡</sup> **4:14:** bokumunge alsena anjokondo “32.2. Pikinini Bilong God”.    <sup>§</sup> **4:16:** bokumunge alsena anjokondo “8. bilip”.

kondolimunge ulu pulumu pemba. Kanu kinie konopu mondopa kondoli ulu pulumu olio kinie pemba kinie Pulu Yemonga kote walemo wendo ombá kinie olio pipili naa kolomolo, 'Olio akumunge uluri molo.' nimbu tondolo mundupu pilipu molemolo.

<sup>18</sup> Konopu mondoli ulu pulumu kinie pipili kololi ulu pulumu kinie telune naa pelembelemonga konopu mondopa kondolimuni pipili kololi ulu pulumu makorolemomonga konopu mondoli ulu pulumu pelemo yemboma Pulu Yemo kinie yemboma kinie konopu mondokolie pipili naa kolemele naa kolonge. Yemboma ulu pulu kerime telememele kinie aku siku mongo limele kanu mongomanga pundu tongendo pipili kolemelela. Pipili kolemele yemboma enonga konopune konopu mondoli ulu pulumu kamu naa pelemola.

<sup>19</sup> Pulu Yemone olio pulu pulu konopu mondorumu kulu kinié olione yu kinie yembo pulu lemoma kinie konopu mondolemolo.\*

<sup>20</sup> Yembo tene 'Na Pulu Yemo konopu mondolio.' nilimo nalo yunge angenu konopu keri panjilimo kinie yu kolo toli yembomo mindi molemo. Yuni yunge angenu mongone kanopalie yu konopu naa mondolemo kinie yuni mongone naa kanolemo Pulu Yemo nambepa konopu mondombaye? „Manda molo.„

<sup>21</sup> Pulu Yemone olio ungu mane sirimu te isipe: 'Yembo Pulu Yemo konopu mondolemo yembomo yuni yunge angenu konopu mondopilila!'.†

---

\* **4:19:** inie 4:10, Jono 13:34. † **4:21:** inie yakondo 2:9-11.

aku sipe ungu mane te sipe panjerimu kanumu.

## 5

### *5:1-5 Yembomane ‘Pulu Yemonga Ambolangoma Molamili.’ Ningulie Telemele Mele*

<sup>1</sup> ‘Pulu Yemone olio ‘Nokopa kondomba ye te lipu mundumbo.’ ou nimbe panjerimu ye nomi Kirasi akumundu pe Yesusi kanu ye Kirasimu\* ombo molorumu.’ ningu pilimele yemboma Pulu Yemonga ambolangoma molemele.<sup>†</sup> Yembo tene ye te konopu mondolemo yembomone kanu yemonga ambolangomo konopu mondolemola.

<sup>2</sup> ‘Olione Pulu Yemo konopu mondopo, yuni “Teaa.” nirimu ulume pilipu lipu telemolo.’ nimbu pilipulie ‘Olione yunge ambolangoma konopu mondolemolo.’ nimbu pilimolo.

<sup>3</sup> Pulu Yemo konopu mondomolondo yuni “Teaa.” nirimu ulume pilipu lipu temolo.<sup>‡</sup> Yuni “Teaa.” nirimu ulume temolondo mindili naa sipu temolo.

<sup>4</sup> Pulu Yemonga ambolango molemele yemboma mana kondi tolemele ulume “Molo!” ningu ulu pulu kerime toko manie mundukulie altoko naa telemele. ‘Pulu Yemonga Malo Yesusi olionga.’ nimbu tondolo mundupu pilimolomonga olione mana ulu kanume “Molo!” nimbu topo manie mundulimolo.

<sup>5</sup> Namele mana ulu pulu kerime “Molo!” ningu toko manie mundulimeleye? Olio ‘Yesusi yu Pulu

\* <sup>5:1:</sup> 6 bokumunge alsena anjokondo “23. Krais”.    † <sup>5:1:</sup> bokumunge alsena anjokondo “31.3. pikinini bilong God”.

‡ <sup>5:3:</sup> Jono 14:15.

Yemonga Malo.'§ nimbu pilimolo yemboma mindi kanu ulume "Molo!" nimbu topo manie mundulimolo lemo.

*5:6-12 Pulu Yemone Malo Molemo Mele Nimbe Para Sirimu Ungumu*

<sup>6</sup> Pulu Yemone "Eno nokopa kondomba ye te lipu mundumbo." ou nimbe panjerimu ye nomi Kirasimu pe Yesusi orumu. Yesusi Kirasi Pulu Yemonga Malo molopa no lsimula; Pulu Yemonga Malo molopa 'Nanga mememo ondon-dopili.' nirimula. Yu Pulu Yemonga Malo molopa no lsimumu manjipe molo. Pulu Yemonga Malo molopa no lsimula, meme 'Ondondopili.' nimbe kolorumula. Mini Kake Telimu ungu sikemanga pulumu molopalie yuni "Yesusi yu sike Ye Nomi Kirasimu ombo molorumu, yu sike Pulu Yemonga Malo." nilimomo paa sike nilimo.

<sup>7</sup> Mele yepokone Yesusi Kirasi ombo molorumu mele lipe ora silimo.

<sup>8</sup> Akume Minimu kinie nomo kinie mememo kinie,aku yepokonga ungu pulu telumu.

<sup>9</sup> Mana yembomane ungume ningu silimele kinie pilipulie 'Sike lepamo.' nimbu pilimolo nalo mana yembomane ningu silimele ungume maniendopa. Pulu Yemone yuyu nimbe silimo ungume olandopamonga yuni yunge Malo molemo mele nimbe sirimu ungumu "Paa sike." nimbu piliemulu liemo papu.

<sup>10</sup> Akumunge yembo tene 'Pulu Yemonga Malo yu sike.' nimbe tondolo mundupe pilimo yembomo yunge konopuni 'Pulu Yemone aku nimbe

---

§ 5:5: bokumunge alsena anjokondo "32.2. Pikinini Bilong God".

silimo ungume sike lemo.' nimbe pilimola. Yembo tene 'Pulu Yemone nilimo ungume sike molo.' nimbe pilimo yembomone aku sipe nimbe pilimomone 'Pulu Yemo yu kolo tolemo yemo.' nimbe pilimo. Nambemune, kanu yembomone Pulu Yemone yunge Malo molemo mele nimbe silimo ungume 'Kolo tokomo.' nimbe pilimo kinie aku sipe 'Pulu Yemone nilimo ungume ungu sikema molo.' nimbe pilimola.

<sup>11</sup> Pulu Yemone nimbe silimo ungumu isipe: Pulu Yemone olio aliei kondé molopo mindi pumolo ulu pulumu\* sirimu. Kanu molopa mindi puli ulu pulumu yunge Malo kinie pelemo.

<sup>12</sup> Pulu Yemonga Malo kinie tapu toko molemele yemboma aku kondé molemele molonge ulu pulumu (Pulu Yemone sirimu kanumu) eno kinie pelemo. Pulu Yemonga Malo kinie tapu toko naa molemele yemboma aku kondé mololi ulu pulumu eno kinie naa pelemo. Akumu Pulu Yemone nimbe silimo ungumu.

### *5:13-21 Pep Topa Pora Simbendo Olio Alieli Molopo Mindi Pumolo Mele Nirimu Ungu Te*

<sup>13</sup> Eno Pulu Yemonga Malonga imbi pilku yu molemo mele 'Sike.' ningu tondolo munduku pilimele yemboma 'eno 'Alieli molko mindi punge ulu pulumu eno kinie pelemo.' ningu tondolo munduku piliengi!' nimbu ipepámo eno topo sikiru.

<sup>14</sup> Olio Pulu Yemonga kumbi-kerena pupu ulu mare mawa temolondo tondolo mundupu pilipulie pumolo mele isipe: Pulu Yemo yuni 'Wendo

---

\* <sup>5:11:</sup> bokumunge alsena anjokondo "24. laip".

opili.' nimbe pilipe molemo mele pilipulie yu molemona pupu mawa temolo kinie 'yu paa sike olionga ungume pilimbe.' nimbu pilipu olio pipili naa kolopo yunge kumbikerena sumbi sipu pulimolo.

<sup>15</sup> Kanu kinie 'Olio yu mawa temolo mele sike pilimbe.' nimbu pilipulie ou naa sipili 'Mawa temolo melema olio sike sirimu simbe koronga límulu.' nimbu pilimolola.

<sup>16</sup> Kirasinge yembo tene Kirasinge yembo te ulu pulu keri te temba kanopalie, aku ulu pulu keri tembamonga yu kolomba ulu te naa pemu liemo ulu pulu keri temba mele kanomba yembomone kanu angenunge Pulu Yemo mawa tendepili. Aku temba kinie Pulu Yemone yu 'altopa konde molopili.' nimbé. We ulu pulu kerimendo nikiru. Yembo tene ulu pulu keri te tembamonga yu kolomba ulu pulu te paa sike pelemo,<sup>†</sup> yembo tene kanu ulu pulu kerimu temba kinie 'Kanu yembomonga Pulu Yemo mawa tendangi.' nimbu naa nikiru.

<sup>17</sup> Pulu Yemo kinie yemboma kinie tepo ken-jilimolo ulume pali Pulu Yemone 'Ulu pulu kerime.' nilimo. Nalo ulu pulu keri mare yembomane telememe aku ulu pulu kerimenga yembo kolonge uluri naa pelemo. Nalo ulu pulu keri telemelangka mare, yemboma aku ulume

---

<sup>†</sup> **5:16:** Jungumunge pulumu yembomane ungu lupe lupe nilimele. Marene ningendo: "Kangimu kolombamondo nirimu." nilimele. Marene ningendo: "Ungu iko mele topa yembomanga minime kolea kerine puku alieli molko kenjiku mindi punge-mondo nirimu." nilimele. Ou-Korini 11:30, Ipuu 6:4-6, 10:26-31, LLuku 12:10, Mateyu 12:31-32.

telemelemonga kolonge uluri naa pelemo.

<sup>18</sup> Olio pilimolo, 'Pulu Yemone merimu yunge ambolango molemele yemboma ulu pulu kerime taki teki teko naa molemele. Pulu Yemonga Mal-one kanu yemboma nokopa kondolemomonga ulu kerimenga pali ulu pulumu pelemo „kuru, muni<sup>‡</sup> eno kamu manda ambolopa mindili naa simbe.' aku nimbu pilimolo.

<sup>19</sup> Olio pilimolo: 'Sike ulu kerimenga pali ulu pulumu pelemo „kuru, muni ma koleana yembomanga ye nomi molopa eno ambolopa nokolemo nalo olio Pulu Yemonga ambolangoma molemolo.' nimbu pilimolo.

<sup>20</sup> Ulu te pilimolola. Akumu isipe: 'Olio 'Sike ye molemomo molopa konopuni pilimo mele piliengi!' nimbe Pulu Yemonga Malo ombo olio pilipe konginjeli sirimu. Olio sike ye molemomo-kinie konopu telune pupili tapu topo molemolo, yunge Malo Yesusi Kirasi yu-kinie kepe pea tapu topo molemolola. I Pulu Yemo Pulu Ye Sikemo, alieli konde molopa mindi puli ulu pulumu pelemo yemo.' nimbu pilimolola.

<sup>21</sup> Nanga ambolango nanama, we melema anjiku 'Olio nokolemele pulu yema.' ningu popo toko melema<sup>§</sup> kalko silimele mele akume liku bulu siku 'paa ambolopo popo naa tomolo.' ningu molangi.

„Aku pea nikiru..»

<sup>‡</sup> **5:18:** bokumunge alsena anjokondo "42.4. wanpela samting nogut".    <sup>§</sup> **5:21:** bokumunge alsena anjokondo "13. god giaman".

**PULU YEMONGA UNGU KONDEMO  
The New Testament in the Kala Dialect of the  
Umbu-Ungu Language of Papua New Guinea  
Nupela Testamen long tokples Umbu-Ungu Kala**

copyright © 1995 Wycliffe Bible Translators, Inc.

Language: Umbu-Ungu Kala (Umbu-Ungu)

Dialect: Kala

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-04

---

PDF generated using Haiola and XeLaTeX on 28 Dec 2024 from source files dated 31 Aug 2023

3bcf1cc7-ff71-5f43-8a87-20ca98e9c4a7